

# Sisimiut eqqaanni imeqarfiup killeqarfilerneqarneranut immikkut ittumik maleruagassat pillugit Namminersorlutik Oqartussat nalunaarutaat

Avatangiisit innarlitsaaliorneqarnissaanik Inatsisartut inatsisaat nr. 9, 22. november 2011-meersumi kingusinnerusukkut allannguuteqartinneqartumi § 28, imm. 3 naapertorlugu aalajangersarneqarpoq:

*Siuñertaq atuuffialu*

**§ 1.** Nalunaarut Sisimiut eqqaanni imeqarfiup killeqarfiinut atuuppoq.

*Imm.* 2. Nalunaarutip siunertaraa Sisimiut eqqaanni imeqarfiusut mingutsinneqarsinnaanerisa killilersimaarniarneqarnissaa. Mingutsitsisoqaratarsinnaaneranik killilersimaarinninniarneq taanna pissaaq, imeqarfiup killeqarfiata iluani illersuinissamut killeqarfinnik immikkut ittunik pilersitsinikkut, aamma imeqarfiup killeqarfiata iluani sulianut ukununnga maleruagassiuniikkut:

- 1) Sisoraatinik arpanneq.
- 2) Qamuteralannik sisorartartunullu illiniliutinik ingerlaarneq.
- 3) Alanngorsuarmi sisorartarfimmik ingerlatsineq.
- 4) Orsussamik assartuineq, toqqortaqarneq atuinerlu.

*Sisimiut eqqaanni imeqarfiup killeqarfiata iluani illersuinissamut killeqarfit immikkut ittut*

**§ 2.** Kuunniit tatsiniillu 30 meterit iluanni tatsit, kuuit sumiiffillu immikkut ittumik illersuivittut killeqarfiupput.

*Sisimiut eqqaanni imeqarfiup killeqarfiani qamuteralannik ingerlaartarneq*

**§ 3.** Taamaallaat sumiiffinni ukunani qamuteralannik ingerlaartoqarsinnaavoq:

- 1) Qamuteralannut illinerni 10 meterinik silissusilinni, tamatumunnga atugassatut nalunaaqutsorsorneqarsimasuni.
  - 2) Sungiusarnissamut immikkoortuni, tamatumunnga atugassatut nalunaaqutsorsorneqarsimasuni
- Imm.* 2. Kommunalbestyrelsi sumiiffinni imm. 1-imi taaneqartuni ersarissumik nalunaaqutsersuissaq. Qamuteralaat illerni sungiusarfillu taamatut nalunaaqutsersuisoqariinngippat atorneqassangillat.
- Imm.* 3. Immikkut ittumik illersuiviusunut killeqarfit iluanni ingerlaarnissaq sapinngisamik

pinngitsoorniarneqassaaq.

*Imm. 4. Qamuteralannut illiniliornermi immikkut ittumik illersuviusunut killeqarfitt aqusaarneqartariaqarpata, kommunalbestyrelsip aqqutissaq peqqissaartumik nalunaaqutsissavaa.*

*Imm. 5. Tatsini sikusimasuni ingerlaarneq taamaallaat pisinnaavoq, kommunalbestyrelsip misissuereernerminigut siku qajannaatsutut nalunaarutigisimappagu.*

*Sisimiut eqqaanni imeqarfimmuit killeqarfiuup iluani sisorartartunut illiniliuutinik ingerlaartarneq*

**§ 4. Sisorartartunut illiniliuutinik ingerlaarneq taamaallaat pisinnaavoq, ilanngussaq 1-imi sisoraatinik arpattartut illinissaattut imaluunniit qamuteralaat illinissaattut nalunaarsorneqarsimasuni, kiisalu Alanngorsuarmiittumi sisorartarfimmi.**

*Imm. 2. Sisoraatinik arpattartut illerni imm. 1-imi taaneqartut sisorartartunut illiniliuutit atorlugit aatsaat suliarineqarsinnaapput, kommunalbestyrelsi sisoraatinik arpattartut illineqarfissaannik ersarissunik nalunaaqutsersuisimappat.*

*Imm. 3. Tatsit sikusigut sisorartartunik illiniliuutinik aatsaat ingerlasoqarsinnaavoq, kommunalbestyrelsip misissuereernermini siku isumannaatsoq nalunaarutigisimappagu.*

*Imm. 4. Illiniliornermi immikkut ittumik illersuinissamut killeqarfitt aqqusarneqarnissaat pisariaqarpat, kommunalbestyrelsi aqqutissamut ersarissumik nalunaaqutsersuissaaq.*

*Imm. 5. § 3-mi aalajangersakkat apeqqutaatinnagut, sisoraatinik ujakkaartartut illinissaat qamuteralaat atorlugit suliarineqassapput.*

#### *Alanngorsuarmi sisorartarfik*

**§ 5. Sisorartarfik pioreersoq massakkut atorneqarnermisut atorneqaannarsinnaavoq. Sisorartarfik makkuninnga illutaqarlunilu atortulersuuteqarpoq:**

1) Illu ataatsimoorussaq igaffilik, kiosk/cafeteriaartalik aamma imaartakkamik perusuersartarflik (Inissismaffia N66.56.360', W053.31.972').

2) Majuartaatip illuarartaa/aqutsiviup illuarartaa (Inissismaffia N66.56.342', W053.31.888').

3) Piffissamik nalunaarsuisartunut illuaraq nr. 1 (Inissismaffia N66.56.330', W053.31.998').

4) Illuaraq aallartarfittut atorneqartartoq nuuttagaq.

5) Containerit pingasut, taakku ilaat ataaseq sarfaliuummik orsussamullu tankimik imaqartoq.

6) Majuartaat innaallagissamik ingerlatilik arfineq marlunnik napparutitalik.

7) Sarfaliuut dieselimik ingerlatilik.

8) Illuaraq nuuttagaq kiisalu illuaqqat perusuersartarfinnut ilassutaasut.

*Imm. 2. Iluarsanneqarnissamik pisariaqartitsiviusut iluarsanneqarsinnaasassapput, atortulersuutinik allilerisoqannngippat imaluunniit iluarsaassineq ima annertutigissanngippat, nutaamik sanasoqarneranut nallersuunneqarsinnaasumik pilersitsisoqarluni.*

*Imm. 3. Nalornisoqartillugu iluarsaassineq nutaamik sananermut nallersuunneqarsinnaasutut annertutiginersoq Naalakkersuisut aalajangissavaat.*

*Sisimiut eqqaanni imeqarfifiup killeqarfifata iluani orsussamik assartuineq toqqortaateqarnerlu*

**§ 6.** Orsussamik assartuineq toqqortaateqarnerlu taamaallaat pisinnaavoq orsussamut puussat CE-mik allagartallit atorlugit.

*Imm. 2.* Orsussamut puussat qamutinut ikillugit qamuteralaat imaluunniit qimmit atorlugit assartorneqartussat annerpaamik 20 literinik imaqqortussuseqarsinnaatitaapput.

*Imm. 3.* Orsussap qamutit, qamuteralannik imaluunniit qimminik uniarneqartut atorlugit assartorneqartussap annerpaaffissa 100 literiuvoq.

*Imm. 4.* Imm. 2-mi aamma 3-mi aalajangersakkat apeqqutaatinaglit, orsussamik sisorartarfimmut assartuinermi orsussamut puussat CE-mik nalunaaqutsikkat atorneqartussat annerpaamik 250 literinik imaqqortussuseqarsinnaatitaapput. Sisorartarfimmut assartuinermi ataatsimi uulianik tunisassiat annerpaamik 800 literit nassarneqarsinnaatitaapput.

*Imm. 5.* Alanngorsuarmi sisorartarfimmu orsussap toqqortaatigineqarsinnaasup annerpaaffissa 1400 literiuvoq.

#### *Nakkutilliineq*

**§ 7.** Ingerlaarnermut illernit, sisoraatinik ujakkaarnermut illernit aamma qamuteralannik sungiusartarfitt nalunaaqutsorsorneqarneri allangngutsaalineqarnersut kommunalbestyrelsip nakkutigissavaa.

*Imm. 2.* Ingerlaarnermut illernit, sisoraatinik ujakkaarnermut illernit aamma qamuteralannik sungiusartarfitt suliarineqarnissaat, aamma § 3 aamma § 4-mi malittarisassat naapertorlugit nalunaaqutsorsorneqarnissaat Naalakkersuisut nakkutigissavaat.

#### *Atulersitsineq aamma ikaarsaarnermut aalajangersakkat*

**§ 8.** Nalunaartut ulloq maaji 15-iat 2015 aallarnerfigalugu atuutilerpoq.

*Namminersorlutik Oqartussat, ulloq aprili 30-iat 2015*

Mala Høy Kúko

/

Mette Skarregård Pedersen

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut